

demonstrirati čitavom svijetu istinsko značenje sporta kao izraza prijateljstva i bratstva sa olimpijskom zastavom koja je njihov simbol. To je naša predstava o miru kako ga mi zamišljamo i kako ga gradimo... Hvala Sarajevu!"

PRAZNIK ZA OKO I DUŠU

Da je već spomenuto prisustvo više hiljada predstavnika štampe, radija i televizije spektaklu svećenog otvaranja Sarajevske olimpijade na Koševu samo po sebi svjetski kuriozitet, govore današnji odjeci njihove profesionalne nazočnosti ovom događaju.

Sve se, na koncu, u toj pravoj poplavi svjetskog publiciteta, u svim tim prvim odjecima i komentarima, može svesti pod jedan dojam: Sarajevo je juče (8. februar 1984) bilo centar svijeta. Grad-domaćin širom je otvorio srce da bi kao svoje rođene prihvatio mlade ljude iz svih kutova planete, sve ljude željne sportskog nadmetanja, mira i prijateljstva.

U tom kontekstu, po svjetskoj štampi, bila je nezaboravna jučerašnja svečanost na stadionu „Koševo”. Reporteri pritom opisuju da su se juče od ranih jutarnjih sati svečano ukrašenim ulicama kretale kolone praznično obučених ljudi – „naoružane” pjesmom, pjevanom valjda na svim jezicima svijeta, simbolima XIV ZOI, zastavama i radošću, slijevajući se u koševsku dolinu.

Poneseni događajem i viđenim, reporteri potom vele da se na stadionu „Koševo” okupio cijeli svijet, veseo, raspjevan, oduševljen gostoljubljem domaćina, pretvorivši sve u praznik za oko i dušu.

Po istim tvrdnjama i utiscima „sedme sile”, grad-domaćin bio je juče nestvarno lijep: pravo prolječno vrijeme zamijenio je snijeg, zabijelivši okolna brda, travnjake i parkove i iskitivši pahuljicama drvorede i perivoje. Desetine hiljada olimpijskih zastava vijore se gradskim ulicama i putevima što vode do prelijepih arena u kojima će ovih dana odmjeravati snagu svjetski asovi bijelih i ledenih sportova.

Tu su, počesto, i širi, poetično ispisani, zapisi i zaključci da se nikada do danas niko nije toliko radovao Olimpijskom plamenu; nikada ovoj uzvireloj planeti nisu bile potrebnije plemenite ideje i ciljevi olimpizma, pa će zato u Sarajevu, rezonuju takvi brojni zaključci, Olimpijski plamen „vječno sijati, dajući svijetu najviše što čovjek može dati – prijateljstvo, nadu i ljubav”.

Japanski gosti i učesnici ovog spektakla – ni ovaj ljudski detalj nije izmakao oku „sedme sile” – nisu slučajno, upravo danas, na volšeban i diskretan način, preko noći, donijeli u olimpijsko Sarajevo 120 stabala mlade japanske trešnje koje žele da posade na prostorima oko borilišta i arena u „Skenderiji” i „Zetri”.

Trešnjin cvijet i plod u drevnoj japanskoj tradiciji osobe ni su simbol velikodušnosti, ljubavi i mira.